

na cai

anuncios >>

mias>> nel día de la Nación Asturiana

Mias>> celebró'l pasáu 8 de setiembre'l día de la Nación Asturiana en Xixón, faciendo un homenaxe al Conseyu Soberanu d'Asturies y Lión énte la Casa Blanca, antigua sé del Conseyu asitiada na plaza'l Parchís de Xixón. Ellí, **Ignaciu Llope, portavoz Nacional d'Izquierda Asturiana** fizo llectura d'un discursu onde quedó espeyada la perdura situación política del país, calificando l'actual estatutu asturianu como "inútil" pa finar colos problemes económicos, políticos, sociales y demográficos d'Asturies nos caberos 30 años. Al tiempu, tamién afitó la importancia d'una braera reforma, que nun puede pasar per alto la denominación de **nación** p'Asturies, la **oficialidá** de la llingua propia, la **soberanía** na toma de decisiones y les **competencies plenes**, dotando al país d'un preseu afayadizu pal pernecesariu espoxigue social, cultural y económicu d'Asturies. Llope afitó tamién el so esmolecimientu al rodiu de la intolerable inxerencia del gobiernu gallegu nel occidente asturianu y finó reivindicando'l papel de la izquierda nacionalista como "instrumentu políticu útil" pa encariar el futuru del país. Dende **mias>>** afalamos a la mocedá asturiano a lluchar con nos por una **Asturies más xusta, ecoloxista, igualitaria y llibre:**
AGORA YE'L MOMENTU!!

Mocedá n'Ochobre 34

En toles revoluciones la **mocedá** xuega un **papel principal**, y l'asturiana de 1934 nun fo una escepción. Les organizaciones xuveniles de la izquierda obrera (Mocedaes Socialistes, Comunistes y Llibertaries) xugaron un papel fundamental na preparación, tanto **loxística** como **psicolóxica**, del procesu revolucionariu, asina como nos **combates** del mesmu y na puesta en marcha del nuevu orde que, per dos selmanes, sustituyó al réxime lliberal-republicanu. Cuando entamó la revolución propiamente dicha, na nueche del 4

al 5 d'ochobre, va ser la **xente mozo** la qu'ocupe la mayoría de los puestos de combate y la qu'apurra los primeros cuadros militares de la revolución. Nes Cuenques, el puxu principal va ser el de les Mocedaes Socialistes, anque les Mocedaes Comunistes xugaríen un papel perimportante en Turón y les Llibertaries en La Felguera. En Xixón, plaza fuerte cenetista, el protagonismu va ser pa les Mocedaes Llibertaries, mentanto les Socialistes y Comunistes tendrínl'u n'Uviéu. De la capital precisamente yera **Aida de la Fuente**, de 16 años, militante, como tola so familia, del PC y les sos mocedaes, que fo **fusilada** polos lexonarios el 13 d'ochobre depués de **resistilos**, arma en mano, na falda del Monte Naranco. El so casu, que nun fo l'únicu nin muncho menos pero qu'impactó más pola so mocedá, convertiría la figura d'Aida de la Fuente nun **símbolu** pa tola mocedá revolucionaria d'Asturies, un exemplu de **coherencia** y **entrega** pa toles persones que llucharon y lluchen pola República Social.



llingua >>

mias>> escontra les inxerencies en política llingüística

mias>> califica d'**intolerable** la propuesta d'Esquerra Republicana de Catalunya na que s'afita que'l **gallegu** ha ser llingua oficial nel territoriu del **occidente d'Asturies**. Dende les mocedaes d'**Izquierda Asturiana** tomamos a ver otra vuelta un intentu de teledirixir la política llingüística dende fuera de les llendes d'Asturies y con plantegamientos que dende la realidá socio-lingüística asturiana son indefendibles dafechu. Dende **mias>>** perafitamos l'**asturianidá** del occidente asturianu y responsabilizamos d'estos fechos al Gobiernu Asturianu pola so pasividá a la hora de curiar y protexer el nuesu patrimoniu llingüísticu

y cultural, abriendo asina la puerta pa que otros se creyan quién pa tomar determinios que namás se pueden tomar dende Asturias.

Amás, consideramos anecdótico qu'un partíu como ERC, que va un añu y mediu pidía'l votu nel nuesu país pa **defender la nuesa identidá** n'Europa, presente agora una propuesta qu'**atenta** radicalmente escontra los intereses xenerales d' Asturias ensin facer apreciu de la propia opinión de les y los asturianos/os.



Poru, énte esta inxerencia, **refugamos** radicalmente que dende intereses ayenos al del nuesu país se faiga por diseñar la nuesa política

llingüística y desiximos al Gobiernu Asturianu que declare la **oficialidá** de la llingua asturiana y del gallego-asturianu nel so territoriu na próxima reforma del estatutu.

enseñu y trabayu

Espaciu Européu d'Educación Superior

Anguaño la Universidá enfréntase a un procesu de **reforma**, rodeáu de una gran polémica y desinformación, que va acabar con una redución de les titulaciones existentes y un aumentu de les tases. L'**alumnáu**, presente y futuru, va vese perxudicáu en dos sentíos: de primeres, l'encarecimientu de los estudios superiores y, de segundes, la institución académica nun va ser más qu'una "escuela de formación" pa futuros trabayadores, dexando a un llau el procuru científicu y intelectual que-y correspuende. Dende **mias>>** consideramos qu'el gobiernu español ta aprovechando esti marcu de reforma y confusión pa facer desaparecer titulaciones— como nel casu de les Filoloxíes— crear graos inesistentes n'Europa — como la Inxeniería Xeolóxica— y p'**alloñar**, más entovía, a la Universidá del conocimientu y de la sociedá.

Amás, creemos qu'esti marcu ye l'afayadizu pa que, d'una vegada, se cree'l títulu de **Filoloxía Asturiana**

ecoloxía >>

Soto - Penagos

La **Secretaría Xeneral de la Comisión Europea** en Bruseles remitió un escritu oficial a IAS, pol que da cuenta de l'almisión de la **denuncia** presentada por esti grupu políticu, na que s'informaba del incumplimientu de normativas comunitaries. A partir d'esti momentu, la Comisión informó a Izquierda Asturiana (IAS) de qu'anicia una fase d'**investigación** que puede acabar nuna **incoación** de procedimientu d'infracción por **violación del Derechu Comunitariu**.



Dende **IAS-mias>>** denunciemos que les torretes de la llinia d'Alta Tensión que va de **Soto Ribera** (Asturies) a **Penagos** (Cantabria) y que crucia tol centru y oriente del país, llantáronse de forma arbitraria, ocupando finques públiques y particulares en dellos casos cola **complicidá d'ayuntamientos** y n'otros cola oposición de conceyos y vecinos. En conceyos como Siero, Nava, Piloña o Onís la llinia **incumple toles normes estatales y europees** sobre la salud, la proteición del mediu ambiente, el paisaxe y el patrimoniu históricu, pasando al llau de viviendes, explotaciones ganaderes, ilesies romániques, yacimientos arqueolóxicos, etc. La obra fíxose ensin denguna evaluación d'impactu, amparaos nuna supuesta "**utilidá pública**" que'l **Tribunal Supremu** anuló depués.

Nel mes de mayu, entamamos una **campana informativa**, que tuvo como fechu más señaláu la **colocación de pancartes en torretes** que denunciaben la ilegalidá del asitiamentu de les plataformes. Aiciones paecies van producirse en prósimes selmanes.

+ecoloxismu sustentabilidá futuru
+xusticia social igualdá llibertá paz
+asturies independendia oficialidá

faite sentir bien alto



www.ias.as/mias
mocedá d'izquierda asturiana
participa llucha tresforma piensa

qué ye mias >>

Somos un grupu de **xente mozo** que facemos por esparder una **conciencia crítica** colo que nos arrodiá dende una perspectiva **asturiana y d'izquierda**. La **Ecoloxía**, la **Xusticia Social** y l'**Asturianismu** son les exes de la nuestra actividá. Actividá que tien de ser fecha **por y pa la mocedá asturiana**, amosando que n' Asturias somos munches/os les/os que nun tamos d'alcuerdu col **modelu**



actual, que nun vemos con bonos güeyos "**l'autonomía**" ruina y **emprestada** que nos "regala" l'estáu español, que nun asumimos como

igua al nuestro futuru la **emigración** obligada, nin la explotación de los **trabayos basura**. Que nun llamamos frente a la **discriminación sexista** que les moces tamos careciendo, nin a la implantación cuasi colonial de **multinacionales**, nin al esfarrape del nuestro **mediu ambiente**...

Trabayamos pa da-y al nuestro país **otra traza**, otru sentir. Queremos una Asturias **respetuosa col mediu, ensin xéneros**, que s'enfrente a la globalización del beneficiu pa cuatro, pa **mundializar los derechos sociales y llaborales**. Una Asturias arguyosa de la so **identidá**, del so valir **cultural y llingüísticu**, una **Asturies soberana**, dueña del so futuru y qu'apueste pola **democracia participativa** con una ciudadanía protagonista de les decisiones que-y afecten. Una **Asturies llibre**, onde la **opción sexual** nun seya torga pal desenvolvimientu social.

Queremos ser la mocedá que faiga por **otra Asturias**, l'Asturies de la xusticia y de la llibertá. **Ente toes y toos** vamos construyir l'**Asturies que vien**.

LLUCHA CON NÓS>>

Mocedá d'Izquierda Asturiana

www.ias.as/mias >> mias@ias.as

Primo de Rivera, 1, Oficina 9. 33001 Uviéu.